

Naqqiut

Siunnersuummut 12. april 2019-imeersumut taarsiissut

(Naalakkersuisup akisussaasuusup taaguutaanik allannguinerit taamatuttaa
siunnersuuteqartup atiata allanngortinnera)

**Qanoq iliorluta Kalaallit Nunaanni savimernit eqqagassat igiinnarnagit
atorluarsinnaaneri pillugit apeqquteqaat aallaavigalugu oqallittoqarnissaanik
siunnersuut.**

(Inatsisartuni ilaasortaq Siverth K. Heilmann, Atassut)

Akissuteqaat

(Naalakkersuisut Siulittaasuat)

Siullermeerneqarnera

Qanoq iliorluta Kalaallit Nunaanni savimernit eqqagassat atorluarnerusinnaanerannut
apeqquteqaat aallaavigalugu oqallittoqarnissaanut Siverth K. Heilmann, Atassut,
siunnersuuteqarsimammat Naalakkersuisut qujapput.

Savimernit eqqagassat allatullu eqqagassat iluamik suliarineqarsimannikkaangamik
illoqarfimmi pinngortitamilu kusanaallisaataasaqaat. Naalakkersuisut kommunillu tungaanniit
eqqagassat sapinngisamik pitsaanerpaamik suliarisalnissaat qitiutinneqarpoq,
taakkunungalugu ilaapput savimernit eqqagassat. Taamaammat eqqagassalerinerup tungaatigut
kommunini suliniutigineqartut arlallit Naalakkersuisunit tapersorsorneqartuqarput.
Naalakkersuisut nuannaarutigeqaat Naalakkersuisut borgmesterillu tamarmiullutik nuna
tamakkerlugu eqqagassalerineq ataatsimoorlutik aaqqiissuteqarfiginiarlugu
isumaqatigiissuteqarsimammata. Kommunit ataatsimoorlutik ingerlatseqatigiiffimmik
eqqagassalerisussamik kommunit ingerlatassaannik pilersitsisimapput, maannalu nunatsinnut
tamarmut iluaqutaasussamik ikuallaavissuarnik marlunnik pilersitsinissaq
sulissutigineqalersimalluni. Naalakkersuisut isumaqarput saviminernik eqqagassanik
suliaqartarpeq eqqagassalerinermut tamarmiusumut ilaassasoq, tassani sapinngisamik
eqqagassat annertunerpaartaat illersorneqarsinnaasumik nunatsinni
suliarineqarsinnaanngortillugit. Sapinngisamik eqqarneqartut amerlanersaannik
atoqqiisarnissaq eqqagassalerinitsinnut ilaaginnartussaassaaq. Soorluttaarlu eqqartukkavut
annikigisassaannigsumik nukissiornermik pilersitsinissamat atorpeqarsinnaanerit
siuarsaaffigissagipput.

Eqqagassaneersunik atoqqiisinnaanermut tunngatillugu avatangiisitigut inuiaqatigiillu
eqqarsaatigalugit aaqqiissutissanik pitsaanerpaanik nassaarnissarput pingaaruteqarpoq.
Taamaamallu saviminernik eqqagassanut aatsitsisarfinnik pilersitsisoqarsinnaanera
misissortariaqarpoq, matumani avatangiisinut inuiaqatigiinnullu sunniutaasussat
eqqarsaatigalugit. Savimernit eqqakkat ima annertuginerlutik nunatsinni suliarissallugit
imminut akilersinnaassalluni? Akuttunngitsumik eqqagassaneersut aalajangersimasumik

annertussusillit pisariaqartinneqartarput eqqagassalerineq najukkami aningaasaqarnikkut akilersinnaassappat. Apeqqutaassaaq nunarsuarimi akiusut, saviminiku akiisa ilumut umiarsuakkoortinnissaannut imminut akilersinnaansoq. Taamaattoq Naalackersuisut kommunillu eqqagassaneersunik najukkani atueqqittarneq pillugu isumassarsianut nutaanut soqutiginnittuaannarput.

Soorlu siunnersuuteqartumit aamma erseqqissarneqartoq kommunit tassaapput eqqagassalerinissamik suliaqartussat - aamma savimernit eqqagassat suliarinissaat eqqarsaatigalugu. Saviminernik eqqagassanik nunani allani illersorneqarsinnaasumik suliarineqarsinnaasunik aammalu ilaannik atueqqiffiusinnaasunik kommunit katersillutillu umiarsuakku nassiussisarput. Ukiuni kingulliunerusuni Naalackersuisut tapersersortigalugit kommuninit suliarineqartup kingunerisimavaa nunatsinni sumiiffinni arlalinni saviminernik eqqagassat malunnartumik annikilleriarsimanerat.

Anguniagaqarfiusumik suliniartoqarneranut ilaasumik eqqagassat angallanneqarnissaannut Naalackersuisut 2017-imi immikkut ittumik 250.000 kr.-inik kommunit immikkut tapiiffigisimavaat. Tamatumani saniatigut kommunit maangaannaq eqqaasernerit immikkut isiginiarsimavaat, pingaartumillu illoqarfinni nunaqarfinnilu eqqiluutsuutitsiniarnerit. Eqqagassanik illersorneqarsinnaasumik angallassisarneq aallartinniarlugu, kommuninilu eqqiluutsuutitsinerunissaq anguniarlugu kommunini tamani avatangiisilerisussamik ukiuni marlunni atorfeqartussamik atorfinitsitsisoqarnissaanut 2017-imi Naalackersuisut aningaasanik tunniussaqaarsimapput. Ilanngutissallugulu pingaartuuvoq 2014-imi immikkut suliffissaqartitsiniarnermut ilaasumik kommunini eqqaavissuaqarfiit salinneqarnissaannut 44,5 mio. kr.-inik immikkoortitsisoqarsimamera. Kommunit eqqaavissuarnik saliineranni ilaatigut saviminernik eqqagassat ilanngunneqarput.

Inatsisartut 2018-imi Ukiakkut Ataatsimiinnerminni Avatangiisinut Aningaasaateqarfik pillugu Inatsisartut inatsisaat nr. 9, 27. november 2018-imeersoq akuersissutigivaat. Avatangiisinut Aningaasaateqarfimmi aningaasat pigineqartut suliniutinut avatangiisinik pitsanngorsaaffiusunut aamma aningaasaateqarfiup anguniagaani sammissassanut tapersersuinissamut atorneqassapput. 2019-imi Naalackersuisut 1. mio. kr.-nit immikkoortissimavaat, taakkulu eqqaasarnermut imaluunniit qamutit motorillit atorunnaarsimasut atuiffigeqqinnissaannut tunngatillugu kommunit misiliutitut suliniutissaannut aningaasaateqarfimmiit tunniunneqarput. Naalackersuisullu siunnersuuteqartumut isumaqataalluinnarput, tassalu saviminernik eqqagassat illoqarfiit iluaniikkunnaartariaqartut, tamannalu aqqutigalugu eqqarneqartut sapinngisamik atoqqillugit.

Nunarput tamakkerlugu siunissami saviminernik eqqagassat suliarisarnissaannut atoqqittarnissaannullu aningaasanik amerlanernik tunniussisoqassappat angallatit motorillit avatangiisinut akitsuusiiffiginissaat allatullu eqqaasarnermut aaqqissuussiffiginissaat pisariaqassaaq, tamannalu aqqutigalugu innuttaasut suliffeqarfiillu angallatit motorillit atorsinnaangitsut tunniuttarnissaannut kajumissuseqarnerulissammata, kiisalu eqqarneqartut avatangiisinut innarliisinnagit eqqortumik suliarineqarsinnaalissammata.

Naalackersuisut taamatut oqaaseqarlutik oqallilluartoqarnissaa qilanaaraat.